


La'ó Hamutuk

Institutu Timor-Leste ba Analiza no Monitor ba Dezenvolvimentu

Rua dos Martires da Patria, Bebora, Dili, Timor-Leste

Tel: +670 332 1040 – Mobile: +670 7734 8703

Email : info@laohamutuk.org Website: www.laohamutuk.org



6 Novembru 2012

KOMUNIKADU IMPRENSA

LA'Ó HAMUTUK SUJERE KONSELLU SEGURANSA ONU LA HALAKON TIMOR-LESTE IHA SIRA NIA AJENDA

Hafoin haknar dezde 1999, ONU sei hakotu nia misaun manutensaun ba paz iha tinan ida ne'e nia rohan. Primeiru Ministru Xanana Gusmão iha nia palestra iha Konsellu Seguransa foin lalais ne'e hateten la presiza tan hanaruk mandatu misaun ONU nian iha Timor-Leste.

La'ó Hamutuk hakerek karta ida ba Konsellu Seguransa ONU no nia delegasaun ne'ebé vizita hela Timór-Leste katak "Povo Timor-Leste sei nafatin agradese ba saida mak ONU halo iha 1999 atu hakotu okupasaun no fó dalan atu restora Repúblika Demokrátika Timor-Leste.[M]aske nune'e, iha buat barak mak tenke halo tan, no ami ta'uk bainhira Konsellu Seguransa no Komunidade Internasionál sira ladún involve atu suporta Timor-Leste iha futuro, bainhira ami nia povu kontinua atu luta hodi hakotu impunidade, atinje justisa ekonómiku no sosiál ne'ebé inkluzivu, no aplika estadu direitu demokrátiku ba ema hotu."

Hatutan tan "ONU no Governu deskreve katak estabilidade no demokrasia iha ona Timor-Leste no sira selebra susesu ida. Maibé, ami hare suporta esensiál sei nafatin presiza hodi nune'e povu Timor-Leste bele sente kontente ba direitu polítiku, ekonómiku no sosiál ne'ebé merese ba umanu tomak."

Impunidade nudár servisu ida ne'ebé misaun ONU la konsege hakotu, maske Sekretáriu Jerál ONU nia relatóriu kona-ba UNMIT foin daudauk ne'e "[E]sforsu tenke foka liu ba medida no dalan sira atu.....promove kontabilidade, inklui la respeita krime kontra umanidade no krime sériu seluk." Impunidade ne'e sei estraga prinsipiú ONU no hatún valor estadu direitu demokrátiku nian.

Aleinde Sekertariu Jeral ONU, relatóriu Especial Rapporteur ba Pobreza Extremu no Direitus Umanu mos sublinha "Hakotu impunidade nudár pra-kondisaun esensiál ida atu garante estabilidade, pás no sustentabilidade." Komisaun Peritu ONU nian iha tinan hitu liu ba mós hateten "[I]ha frustasaun iha povu Timor-Leste nia leet kona-ba laiha abilidade hosi Unidade Krime Graves no Painél Espesiál atu lori justisa ba kriminozu sira ne'ebé hela iha lí'ur hosi jurizdisaun nasaun nian."

Karta ne'e deskreve "Ohin loron impunidade ba krime pasadu sei prevaleze, kriminozu boot sira goza hela impunidade hodi hetan protesaun hosi ukun na'in no instituisaun sira, nune'e ema seluk sei komete krime ho sira nia liman rasik." Nune'e La'ó Hamutuk husu ba Konsellu Seguransa atu kontinua buka dalan ba komidade internasionál sira hodi garante atu obedese justisa internasionál.

Aleinde hatudu problema justisa nian, karta ne'e mós preokupa ekonomia Timor-Leste ne'ebé depende maka'as ba reseita naun renovavel hosi esportasaun petróleu, no gasta osan barak atu importa duke esporta.

Durante 2011 Timor-Leste hetan biliaun \$3.2 hosi fan mina-rai no gas, rekursu ne'ebé bele hotu iha 2024. Karik Governu kontinua polítika orsamentál ohin loron nian, ne'e sei hamamuk Fundu Petrolíferu molok 2024, iha tempu ne'ebé Timor-Leste sei selu tusan, no número joven ne'ebé tama ba kampu servisu sei aumenta dala rua kompara iha tinan 2012. Karik joven sira la hetan edukasaun di'ak no ekonomia formal la bele fó servisu ba sira, Timor-Leste sei la bele seguru.

La'ó Hamutuk mós husu ba Konsellu Seguransa ONU atu ajuda Timor-Leste hodi participa iha komidade global, hodi espresa katak "[H]o misaun ONU ne'ebé atu sai hosi Timor-Leste no hamoos tiha Timor-Leste iha agenda Konsellu Seguransa nian, ami preokupa Timor-Leste nia relasaun ho mundu bele sai fraku".

Ohin loron "Ami nia Governu prioritiza estadu frajil "g7+ no Komidade Nasaun Lusophone.....prioritiza sai membru ASEAN, ami nia nasaun viziñu sira ne'ebé maka'as liu suporta okupasaun ilegál Indonézia nian. Merkadu Livre ASEAN nia implikasaun sei bele difikulta atu dezenvolve ami nia ekonomia."

La'ó Hamutuk apresia ba nasaun balu ne'ebé suporta Timor-Leste durante rezisténsia no hafoin 1999 no valoriza nasaun sira ne'ebé hafoin 1999 sai membru Konsellu Seguransa ba sira nia asisténsia hosi Grupu Nukleu iha Kuartél Jerál ONU nian. Espera katak Konsellu Seguransa sei la haluha Timor-Leste maske la'ós ona iha agenda Konsellu Seguransa nian.